

Na osnovu člana 30. stav (1) tačka p) i stava (2) i člana 46. Zakona o plaćama i naknadama u institucijama Bosne i Hercegovine ("Službeni glasnik BiH", br. 50/08 i 35/09), člana 50. stav 4. tačka g) i stav 6. Zakona o radu u institucijama Bosne i Hercegovine ("Službeni glasnik BiH", br. 26/04, 7/05 i 48/05) i člana 17. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08), Vijeće ministara Bosne i Hercegovine na 91. sjednici, održanoj 17. juna 2009. godine, donijelo je

ODLUKU

O NAČINU I POSTUPKU OSTVARIVANJA PRAVA NA OTPREMNINU PRILIKOM ODLASKA U PENZIJU U INSTITUCIJAMA BOSNE I HERCEGOVINE

Član 1.
(Predmet Odluke)

Ovom Odlukom uređuje se način i postupak ostvarivanja prava zaposlenih u institucijama Bosne i Hercegovine na otpremninu prilikom odlaska u penziju, u skladu sa članom 46. Zakona o plaćama i naknadama u institucijama Bosne i Hercegovine i članu 50. stav 4. tačka g) Zakona o radu u institucijama Bosne i Hercegovine.

Član 2.
(Visina naknade)

Zaposleni u institucijama Bosne i Hercegovine ima pravo na otpremninu prilikom odlaska u penziju u visini svojih šest ostvarenih neto plaća, izuzimajući novčanu nagradu i naknadu za obavljanje poslova drugog radnog mjesta, isplaćenih u prethodnih šest mjeseci ili šest prosječnih mjesečnih neto plaća iz prethodne godine u Bosni i Hercegovini ako je to za njega povoljnije.

Član 3.
(Izdavanje rješenja)

Rješenje o otpremnini prilikom odlaska u penziju zaposlenom u institucijama Bosne i Hercegovine rukovodioc institucije dužan je izdati najkasnije 10 dana od dana izdavanja rješenja o prestanku radnog odnosa.

Član 4.
(Obračun i isplata naknade)

Obračun i isplata otpremnine prilikom odlaska u penziju za zaposlene u institucijama Bosne i Hercegovine vrši se uz mjesečni obračun i isplatu plaća i naknada zaposlenih u institucijama Bosne i Hercegovine na osnovu rješenja o otpremnini izdatog od strane rukovodioca institucije.

Član 5.
(Institucije odgovorne za provođenje Odluke)

Za realizaciju ove Odluke zadužuju se institucije Bosne i Hercegovine i Ministarstvo finansija i trezora.

Član 6.
(Stupanje na snagu)

Odluka stupa na snagu narednog dana od dana objavljivanja u "Službenom glasniku BiH".

VM broj 173/09
17. juna 2009. godine
Sarajevo

Predsjedavajući
Vijeća ministara BiH
Dr. **Nikola Špirić**, s. r.
